

示一小紙及行長書簡二丈小紙乃行長要請七事也與前日
狀啓意一般矣揔兵又曰倭國自九月以後若選將鍊兵則今
可得滿萬精銳邇來數三月徒言而無實解到之兵旋即逃散
雖言遶截不可得況念殺他乎且全羅之兵或召募或抄發不
必來到吾營若仍守全羅一邊防禦一邊教訓則我當臨時觀
勢調取用之矣臣等答曰老爺如是分付不勝感激選兵儲糧
極為緊急小的當母分晝夜用心措置云而退大抵觀其意則
不以賊勢為甚難而壓於經略提督且恐舉事而或有未利則
不免罪責以此多有遲疑之心終無結末歸宿之所至為憫慮
然在我國之道將調兵運糧極力措置一邊懇請與之協力此
外更無他策矣 答曰知道○自辰時至巳時日暈午時日暈
兩耳未時申時日暈○夜一更西方有赤氣自一更至二更客
星在天倉東第三星內三寸許形體微小○政院 啓曰臣等
伏見遠接使狀 啓則東坡站并定之官皆不來到以致 天
使寢食俱廢至於發怒書送小帖多有未安之意極為駭愕守